

598.

Na osnovu člana 93. i 96. stav (2) Poslovnika Skupštine Unsko-sanskog kantona („Službeni glasnik Unsko-sanskog kantona“, br. 9/17 i 11/21), na prijedlog Vlade Unsko-sanskog kantona, na 37. redovnoj sjednici, održanoj dana 28. 4. 2026. godine, Skupština Unsko-sanskog kantona d o n o s i

ZAKLJUČAK

Član 1.

Prihvata se Program rada Sportskog saveza Unsko-sanskog kantona za 2026. godinu.

Član 2.

Ovaj Zaključak stupa na snagu danom donošenja i objaviće se u „Službenom glasniku Unsko-sanskog kantona“.

Broj: 01/1-2-45-669/26
28. aprila 2026. godine
Bihać

Predsjedavajući Skupštine
Unsko-sanskog kantona
Nisvet Jusić

599.

Na osnovu člana 93. i 96. stav (2) Poslovnika Skupštine Unsko-sanskog kantona („Službeni glasnik Unsko-sanskog kantona“, br. 9/17 i 11/21), na prijedlog Vlade Unsko-sanskog kantona, na 37. redovnoj sjednici, održanoj dana 28. 4. 2026. godine, Skupština Unsko-sanskog kantona d o n o s i

ZAKLJUČAK

Član 1.

Prihvata se Program rada JU
Pedagoški zavod Unsko-sanskog kantona
za 2026. godinu.

Član 2.

Ovaj Zaključak stupa na snagu danom donošenja i objaviće se u „Službenom glasniku Unsko-sanskog kantona“.

Broj: 01/1-2-45-670/26
28. aprila 2026. godine
Bihać

Predsjedavajući Skupštine
Unsko-sanskog kantona
Nisvet Jusić

600.

Na osnovu člana 16. Zakona o Vladi
Unsko-sanskog kantona („Službeni glasnik

Unsko-sanskog kantona“, broj 5/08), a u vezi s članom 131. stav (1) Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije Bosne i Hercegovine“, broj: 39/03, 22/06 i 43/10), na prijedlog Kantonalne uprave civilne zaštite, Vlada Unsko-sanskog kantona na 28. sjednici, održanoj dana 6. 5. 2026. godine, d o n o s i

UREDBU

**o formiranju Kantonalne mješovite
specijalizirane jedinice civilne zaštite**

POGLAVLJE I. OSNOVNE ODREDBE

Član 1.

(Predmet Uredbe)

Ovom Uredbom osniva se Kantonalna mješovita specijalizirana jedinica civilne zaštite (u daljnjem tekstu: Specijalizirana jedinica), utvrđuje se vrsta jedinice i njena namjena, zadaci koje će obavljati, područje na kojem će djelovati, način popune jedinice ljudstvom, materijalno-tehničkim sredstvima i drugim sredstvima koja su potrebna za rad jedinice, način organiziranja i provođenja obuke, osposobljavanja pripadnika Specijalizirane jedinice, kao i obaveze Kantonalne uprave civilne zaštite (u daljnjem tekstu: Uprava) u vezi vršenja svih poslova na organiziranju, popuni, materijalno-tehničkom opremanju, obučavanju i osposobljavanju pripadnika ove jedinice.

Član 2.

(Izvođenje složenijih spasilačkih intervencija)

Specijalizirana jedinica namijenjena je za izvršavanje složenijih spasilačkih intervencija koje zahtijevaju brzu i efikasnu akciju spašavanja života i zdravlja ljudi i materijalnih dobara, kada organizovane snage zaštite i spašavanja općina/gradova nisu dovoljne da brzo i efikasno izvrše sve zadatke na zaštiti i spašavanju ugroženih ljudi i materijalnih dobara, kada prijeti neposredna opasnost od nastanka prirodne i druge nesreće ili je nastala prirodna i druga nesreća.

**POGLAVLJE II. ORGANIZOVANJE,
ZADACI I SASTAV
SPECIJALIZIRANE JEDINICE
CIVILNE ZAŠTITE**

Član 3.

(Organizovanje Specijalizirane jedinice)

U sastavu Specijalizirane jedinice nalaze se četiri tima i to:

- a) Tim za spašavanje iz ruševina i urbanu pretragu terena – USAR,
- b) Tim za spašavanje sa visina i ruralno traganje i spašavanje,
- c) Tim za gašenje požara,
- d) Tim za zaštitu i spašavanje na vodi i pod vodom.

Član 4.

(Poslovi i zadaci Specijalizirane jedinice)

Timovi iz člana 3. ove Uredbe vrše sljedeće poslove i zadatke:

- a) Tim za spašavanje iz ruševina i urbanu pretragu terena – USAR:
 - otkriva, pronalazi i spašava ljude zatrpene u ruševinama i spašava ugrožene i nastradale iz oštećenih objekata;
 - izviđa ruševine, osigurava oštećene i pomjerene dijelove konstrukcija zgrada i objekata radi sprječavanja zarušavanja;
 - traga, locira i spašava povrijeđena lica iz ruševina ili krhotina (kao što su srušeni stambeni objekti ili saobraćajne nezgode);
 - spašava ljude zatrpene u ruševinama korištenjem odgovarajućih tehničkih sredstava, pasa tragača i drugih tehnika;
 - povrijeđenim licima iz ruševina ili krhotina organizuje prvu medicinsku pomoć i transport sa nepristupačnih ili teško pristupačnih područja do najbližih sigurnih prihvatilišta medicinskog zbrinjavanja (zdravstvene ustanove);
 - čisti ruševine upotrebom odgovarajućih mašina, uređaja i drugog namjenskog alata i sredstava radi spašavanja povrijeđenih lica;
 - spašava ljude i materijalna dobra iz

oštećenih objekata od požara i sa viših spratova;

- izvlači materijalna dobra izvan zona rušenja;
- vrši druge poslove i zadatke iz svoje nadležnosti za koje je osposobljen;

- b) Tim za spašavanje sa visina i ruralno traganje i spašavanje:

- spašavanje ljudi i materijalnih dobara iz teško pristupačnih planinskih predjela, lavina i kanjona, iz podzemnih objekata i na mirnim i divljim vodama na području na kojem bude angažovan;
- povrijeđenim licima organizuje prvu medicinsku pomoć i transport sa nepristupačnih i teško pristupačnih područja do najbližih sigurnih prihvatilišta medicinskog zbrinjavanja (zdravstvene ustanove);

- c) Tim za gašenje požara angažuje se za obavljanje sljedećih poslova i zadataka:

- učestvuje u akcijama gašenja požara na otvorenom prostoru;
- vrši gašenje požara i zaštitu od požara na šumama i šumskom zemljištu, zaštićenim područjima prirode, poljoprivrednim površinama, stambenim, privrednim i drugim javnim objektima i prevoznim sredstvima;
- pruža pomoć u gašenju požara na stambenim i drugim zgradama i objektima i drugoj imovini na pogođenom prostoru (prilikom vatrogasnih intervencija);
- vrši sprječavanje prenošenja vatre na okolne objekte i prostore;
- učestvuje u spašavanju ljudi i materijalnih dobara u većim saobraćajnim nesrećama;
- poduzima aktivnosti na spašavanju ljudi i materijalnih dobara koji su ugroženi požarom;
- osigurava polustambene, mobilne i druge odgovarajuće instalacije i uređaje za gašenje požara;
- vrši druge poslove zaštite i spašavanja za koje je osposobljen;

d) Tim za zaštitu i spašavanje na vodi i pod vodom:

- spašavanje ljudi i materijalnih dobara na rijekama, jezerima, moru i poplavljenim područjima;
- osigurava i vrši prevoz ljudi i materijalnih dobara preko rijeka, jezera i poplavljenih područja;
- spašava ljude i materijalna dobra na brzim vodama;
- evakuira ljude iz ugroženih / poplavljenih područja do najbližih sigurnih prihvatilišta organizovanog zbrinjavanja (zdravstvene ustanove);
- traži utopljena lica iz jezera, rijeka, bunara i drugih mjesta koji su ugroženi vodom;
- vrši snabdijevanje poplavom ugroženog stanovništva potrebnim namirnicama i drugim sredstvima radi preživljavanja;
- vrši izvlačenje utopljenika, materijalnih dobara i uginulih životinja iz vode;
- pruža podršku drugim službama i jedinicama na ispumpavanju vode iz poplavljenih objekata;
- vrši i druge poslove i zadatke iz svoje nadležnosti za koje je osposobljen.

POGLAVLJE III. POPUNA LJUDSTVOM I OPREMANJE MATERIJALNO - TEHNIČKIM SREDSTVIMA

Član 5.

(Sastav Specijalizirane jedinice)

- (1) Sastav Specijalizirane jedinice utvrđuje se ličnom i materijalnom formacijom, u skladu sa članom 43. Pravilnika o organizovanju službi zaštite i spašavanja i jedinica civilne zaštite, njihovim poslovima i načinu rada („Službene novine Federacije Bosne i Hercegovine“, broj: 77/06, 52/22 i 42/23).
- (2) Lična i materijalna formacija Specijalizirane jedinice nalazi se u prilogu ove Uredbe i čini njen sastavni dio.

Član 6.

(Popuna Specijalizirane jedinice)

- (1) Popuna Specijalizirane jedinice vrši se ljudstvom iz kantonalnih službi zaštite i

spašavanja, udruženja građana, dobrovoljnih vatrogasnih društava sa područja Unsko-sanskog kantona (u daljnjem tekstu: Kanton) i drugih obveznika civilne zaštite koji imaju stručna znanja i vještine potrebne za vršenje poslova i zadataka iz njene nadležnosti.

- (2) Angažovanje iz stava (1) ovog člana vrši se na osnovu pojedinačnih rješenja koje donosi Uprava.
- (3) Popuna materijalno - tehničkim sredstvima (u daljnjem tekstu: MTS) vrši se u skladu sa Uredbom o načinu davanja i vraćanja materijalnih sredstava uzetih za potrebe civilne zaštite („Službene novine Federacije Bosne i Hercegovine“, broj: 23/04 i 38/06).
- (4) Nabavka MTS iz stava (3) ovog člana vrši se prema godišnjem planu opremanja, koji izrađuje Uprava.

POGLAVLJE IV. PODRUČJE DJELOVANJA SPECIJALIZIRANE JEDINICE I NJENO ANGAŽOVANJE

Član 7.

(Područje djelovanja Specijalizirane jedinice)

Specijalizirana jedinica će poslove iz svoje nadležnosti obavljati na cijelom području Kantona, u svim slučajevima kada organizirane snage zaštite i spašavanja općine/grada, na čijem području je nastala ili prijeti da nastane prirodna i druga nesreća, nisu dovoljne da brzo i efikasno izvrše sve zadatke na zaštiti i spašavanju života i zdravlja ljudi i materijalnih dobara, a prema ukazanoj potrebi i u aktivnostima pružanja pomoći unesrećenima na drugim područjima Bosne i Hercegovine i u inostranstvu.

Član 8.

(Angažovanje Specijalizirane jedinice)

- (1) Angažovanje Specijalizirane jedinice vrši se na zahtjev općinskog/gradskog štaba civilne zaštite u slučajevima:
 - a) proglašenja prirodne i druge nesreće na njihovom području,
 - b) za vrijeme vježbi,
 - c) obuke,
 - d) ratnog stanja,
 - e) u slučaju neposredne opasnosti od nastanka prirodne i druge nesreće, kada je njeno angažovanje neophodno, bez obzira da li je u

općini / gradu proglašeno stanje prirodne i druge nesreće.

- (2) Angažovanje Specijalizirane jedinice na drugim područjima Bosne i Hercegovine vrši se na zahtjev Federalnog štaba civilne zaštite.
- (3) Angažovanje Specijalizirane jedinice u inostranstvu vrši se na zahtjev Ministarstva sigurnosti Bosne i Hercegovine, u skladu sa međunarodnim konvencijama i bilateralnim sporazumima o saradnji u oblasti zaštite i spašavanja od prirodnih i drugih nesreća koje je Bosna i Hercegovina ratifikovala te Mehanizmom Evropske unije za civilnu zaštitu.
- (4) Zahtjev iz stavova (1), (2) i (3) ovog člana podnosi se Upravi, a Uprava isti proslijeđuje Kantonalnom štabu civilne zaštite (u daljnjem tekstu: Štab), koji odlučuje o zahtjevu izdavanjem naredbe o angažovanju Specijalizirane jedinice.
- (5) U slučaju hitne potrebe, angažovanje Specijalizirane jedinice može narediti i komandant Štaba, ako se sjednica Štaba ne može odmah sazvati.
- (6) U slučaju da je komandant Štaba odsutan ili iz drugih razloga spriječen da vrši svoju dužnost, naređenje za angažovanje Specijalizirane jedinice izdaje načelnik Štaba.
- (7) O razlozima za angažovanje Specijalizirane jedinice, pod uslovima iz stavova (4), (5) i (6) ovog člana, komandant, odnosno načelnik Štaba, dužan je na prvoj sjednici upoznati članove Štaba.

Član 9.

(Naredba o angažovanju Specijalizirane jedinice)

Naredba o angažovanju Specijalizirane jedinice sadrži:

- a) naziv jedinice ili tima iz njenog sastava koji se angažuje,
- b) područje na kojem će djelovati,
- c) vrijeme angažovanja,
- d) obaveze Uprave u vezi sa realizacijom naredbe Štaba.

Član 10.

(Komandovanje Specijaliziranom jedinicom)

- (1) Komandovanje Specijaliziranom jedinicom, u svim slučajevima njenog

angažovanja, po naredbi Štaba vrši starješina jedinice, a komandovanje u slučajevima angažovanja nekog od timova Specijalizirane jedinice, vrši vođa tima koji se angažuje.

- (2) Poslove iz svoje nadležnosti Specijalizirana jedinica vrši samostalno, a po potrebi može biti angažovana i kao pomoć kantonalnim službama zaštite i spašavanja koje se aktiviraju na ugroženom području.
- (3) U slučajevima kada se Specijalizirana jedinica angažuje na području općine/grada na čijem području je nastala prirodna i druga nesreća, ona izvršava zadatke iz svoje nadležnosti na lokalitetu koje odredi štab civilne zaštite općine/grada koji na tom području rukovodi akcijama zaštite i spašavanja, odnosno postupa po naredbama tog štaba.

POGLAVLJE V. NADLEŽNOSTI UPRAVE

Član 11.

(Poslovi Uprave u odnosu na Specijaliziranu jedinicu)

- (1) Uprava vrši sve poslove koji se odnose na formiranje i funkcionisanje Specijalizirane jedinice i to:
 - a) predlaže ličnu i materijalnu formaciju jedinice;
 - b) vrši popunu Specijalizirane jedinice ljudstvom i MTS u skladu sa ličnom i materijalnom formacijom;
 - c) vrši planiranje i nabavku opreme i MTS potrebnih za njen rad;
 - d) planira, organizuje i izvodi obuku i osposobljavanje njenih pripadnika;
 - e) vrši pripreme za njeno angažovanje;
 - f) planira i obezbjeđuje finansijska sredstva potrebna za naknade i druge troškove kada jedinica bude angažovana na vršenju zadataka iz svoje nadležnosti;
 - g) vrši i druge poslove koji se odnose na organizovanje, pripremanje i angažovanje Specijalizirane jedinice.

- (2) Uprava će donijeti standardno operativne procedure - SOP koje se moraju ispoštovati da bi Specijalizirana jedinica mogla biti angažovana.

**POGLAVLJE VI. OBUČAVANJE I
OSPOSOBLJAVANJE PRIPADNIKA
SPECIJALIZIRANE JEDINICE****Član 12.
(Obučavanje i osposobljavanje)**

- (1) Obučavanje i osposobljavanje pripadnika Specijalizirane jedinice za vršenje poslova i zadataka iz svoje nadležnosti provodi se po nastavnom planu i programu obuke koji donosi direktor Federalne uprave civilne zaštite.
- (2) Pored zajedničke obuke, starješina Specijalizirane jedinice i vođe timova obučavaju se i kroz specijalističke kurseve/seminare koji se organizuju svake godine.

**POGLAVLJE VII. FINANSIRANJE
SPECIJALIZIRANE JEDINICE****Član 13.
(Osiguranje finansijskih sredstava za
nabavku sredstava i opreme)**

- (1) Finansijska sredstva potrebna za obavljanje poslova iz nadležnosti Specijalizirane jedinice planiraju se i obezbjeđuju u Budžetu Kantona - Kantonalna uprava civilne zaštite.
- (2) Finansijska sredstva po osnovu člana 180. Zakona o zaštiti i spašavanju za potrebe finansiranja Specijalizirane jedinice planiraju se u skladu sa Odlukom o uvjetima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća („Službene novine Federacije BiH“, broj: 4/12, 80/13 i 20/20).

**POGLAVLJE VIII. PRELAZNE I
ZAVRŠNE ODREDBE****Član 14.
(Prestanak važenja ranije Uredbe)**

Danom stupanja na snagu ove Uredbe prestaje da važi Uredba o formiranju Kantonalne mješovite specijalizirane jedinice civilne zaštite („Službeni glasnik Unsko-sanskog kantona“, broj 2/09).

**Član 15.
(Stupanje na snagu)**

Ova Uredba stupa na snagu narednog dana od dana objave u „Službenom glasniku Unsko-sanskog kantona“.

Broj: 03-02-44-577/2026
6. maja 2026. godine
Bihać

PREMIJER KANTONA
mr. sci. Mustafa Ružnić